



V O D I Č

za pristup informacijama u Federalnoj upravi policije za podnosiocze zahtjeva

i

INDEKS REGISTAR

Informacija koje su pod kontrolom Federalne uprave policije

Adresa: Federalno ministarstvo unutrašnjih poslova/ Federalno ministarstvo unutarnjih poslova
– Federalna uprava policije; ulica Mehmeda Spahe broj 7, 71 000 Sarajevo; tel.br. 033/280-020,
fax: 033 590 233, www.fup.gov.ba, e-mail: zospi@fup.gov.ba

Na osnovu člana 41. u vezi sa članom 45. stav 2. Zakona o unutrašnjim poslovima Federacije Bosne i Hercegovine („Službene novine Federacije BiH“, broj: 81/14) i članom 20. Zakona o slobodi pristupa informacijama u Federaciji Bosne i Hercegovine („Službene novine Federacije BiH“, broj: 32/01 i 48/11), zamjenik direktora Federalne uprave policije donosi

V O D I Č

za pristup informacijama u Federalnoj upravi policije za podnosiocje zahtjeva

Član 1. (Predmet)

- (1) Predmet Vodiča je da pomogne podnosiocima zahtjeva da ostvare svoja prava u skladu sa Zakonom o slobodi pristupa informacijama u Federaciji Bosne i Hercegovine („Službene novine Federacije BiH“ broj: 32/01 i 48/11). Svrha Vodiča je da zainteresovane uputi kako da što jednostavnije dođu do informacija koje su u posjedu Federalne uprave policije.
- (2) Sastavni dio ovog Vodiča je Indeks registar, te će se istim propisati način pristupa Registru.

Član 2. (Pravo pristupa)

Svako fizičko i pravno lice ima pravo pristupa informacijama koje su pod kontrolom Federalne uprave policije, a Federalna uprava policije je obavezna te informacije priopćiti podnosiocu zahtjeva. Informacije koje su pod kontrolom Federalne uprave policije sadržane su u Indeks registru. Pravo pristupa informacijama može biti ograničeno samo kod utvrđenih izuzetaka u slučajevima kada se priopćavanjem informacije osnovano može očekivati izazivanje značajne štete za slijedeće legitimne ciljeve Federacije:

- a) Interesi odbrane i sigurnosti, kao i zaštita javne sigurnosti,
- b) Sprječavanje i otkrivanje kriminalnih aktivnosti,
- c) Zaštita postupka donošenja odluka u javnom organu, uključujući davanje mišljenja, savjeta ili preporuka, bilo da se radi o osobi zaposlenoj u javnom organu ili drugoj osobi koja radi za ili u ime javnog organa, s tim da to ne obuhvaća činjenične, statističke, naučne ili tehničke informacije i
- d) Izuzeci navedeni odredbama člana 7. i 8. Zakona o slobodi pristupa informacijama u Federaciji Bosne i Hercegovine.

Član 3. (Način pristupa)

- (1) Postupak za dobijanje informacije kojima raspolaže Federalna uprava policije je slijedeći:
 - a) Podnošenje zahtjeva;
 - b) Zahtjev za pristup informaciji mora:
 - biti u pisanom obliku i na jednom od službenih jezika u Federaciji BiH;
 - sadržavati dovoljno podataka o prirodi i/ili sadržaju informacije, kako bi se omogućilo da se uz razuman napor pronađe tražena informacija i dostavi podnosiocu zahtjeva i
 - sadržavati ime i prezime podnosioca zahtjeva i njegovu adresu, kao i druge podatke koje podnositelj zahtjeva smatra potrebnim (broj telefona, e-mail adresu i sl.)

- c) Ako se zahtjev odnosi na osobnu informaciju podnosioca zahtjeva, tada zahtjev, pored ispunjavanja uvjeta iz tačke b) ovog člana, mora ispunjavati i slijedeće uvjete:
- Zahtjev može podnijeti samo fizička osoba na koju se informacija odnosi, njen zakonski zastupnik ili osoba koju je pismeno ovlastio za pristup informaciji;
 - Ukoliko zahtjev podnosi osoba na koju se zahtjev odnosi ista je dužna potpisati zahtjev i pokazati osobni dokument sa fotografijom;
 - Ukoliko zahtjev podnosi zakonski zastupnik ili osoba koju je pismeno ovlastio tražilac informacije za pristup informaciji ista je dužna potpisati zahtjev i pokazati osobni dokument sa fotografijom, dokaz o zakonskom zastupanju, odnosno pismeno ovlaštenje za podnošenje zahtjeva, kao i kopiju osobnog dokumenta podnosioca zahtjeva.
- (2) Zahtjev se podnosi Federalnoj upravi policije (osobno, poštom, faksom ili e-mailom) na slijedeću adresu:
- Federalno ministarstvo unutrašnjih poslova**
Federalno ministarstvo unutarnjih poslova
Federalna uprava policije
Ulica Mehmeda Spahe br. 7
71 000 Sarajevo
-Službenik za informisanje-
- (3) Federalna uprava policije će postupati prema odredbama Zakona o slobodi pristupa informacijama u Federaciji Bosne i Hercegovine, dok se na pitanja postupka koja nisu uređena navedenim Zakonom primjenjuje Zakon o upravnom postupku („Službene novine Federacije BiH“, broj: 2/98 i 48/99).

Član 3.

(Postupanje nakon zaprimanja zahtjeva i donošenje rješenja)

- (1) Nakon prijema zahtjeva za pristup informacijama preduzet će se sve potrebne radnje da se pribavi tražena informacija, te razmotriti sve činjenice i okolnosti od značaja za rješavanje zahtjeva.
- (2) Kada su ispunjene sve pretpostavke za odobravanje pristupa informaciji u cjelosti ili djelimično, donosi se rješenje, koje sadrži:
- obavještenje o mogućnosti osobnog pristupa informaciji u prostorijama Federalne uprave policije, kao i o mogućnosti umnožavanja informacije i troškovima umnožavanja, uz napomenu da se umnožavanje informacije omogućava nakon izvršene uplate troškova umnožavanja. Kada je umnožavanje dokumentacije na koju se odnosi tražena informacija neuobičajeno složeno ili dugotrajno, isto će se omogućiti podnosiocu zahtjeva u vrijeme koje je prihvatljivo i za njega i za javni organ;
 - Ukoliko se dokumentacija na koju se odnosi tražena informacija osigurava besplatno u smislu odrebe člana 16. stav 2. Zakona o slobodi pristupa informacijama u Federaciji Bosne i Hercegovine (standardna veličina fco. deset stranica), odobrit će se pristup traženim informacijama i ista će se priložiti uz rješenje. Ukoliko informacija sadrži više od 10 stranica, cijena umnožavanja iznosi 0,50 KM za svaku stranicu standardne veličine koja prelazi 10 prvih besplatnih stranica, dok cijena dostavljene dokumentacije u elektronskoj kopiji iznosi 5 KM po CD-u.
- (3) Ukoliko nadležni javni organ odluči odbiti pristup traženim informacijama u cjelosti ili djelimično, donijet će rješenje o odbijanju pristupa traženim informacijama te će u istom

navesti zakonski osnov izuzeća informacije, uključujući sva materijalna pitanja važna za donošenje rješenja, kao i uzimanje u obzir faktora javnog interesa.

- (4) Ukoliko se donese rješenje o odbijanju pristupa traženim informacijama, isto mora sadržavati pouku o pravu na prigovor sa jasnim uputama u pogledu roka, troškova i adrese organa kojem se podnosi prigovor.
- (5) Rješenje se dostavlja podnosiocu zahtjeva, odnosno osobi ovlaštenoj za pribavljanje tražene informacije, što je prije moguće, a najkasnije u roku od 15 dana od dana prijema zahtjeva.

Član 4. **(Objavljivanje i stupanje na snagu)**

Ovaj Vodič će biti objavljen na službenoj web stranici Federalne uprave policije, te danom objavljivanja stupa na pravnu snagu.

Član 5. **(Stavljanje van snage)**

Danom stupanja na snagu ovog Vodiča prestaje da važi Vodič za pristup informacijama kojima raspolaže Federalna uprava policije, broj: 09-950 od 24.05.2006. godine.

Broj: 09-1911-02-2-578
Datum: 27. 10. 2020



ZAMJENIK DIREKTORA
Generalni inspektor policije

[Signature]
Ensad Korman

INDEKS REGISTAR

Ovaj Indeks registar sadrži vrste informacija koje su pod kontrolom Federalne uprave policije, oblik u kojem su iste na raspolaganju Federalnoj upravi policije, kao i mjesto pristupa informacijama.

Vrste informacija

- Statistički podaci iz oblasti stanja kriminaliteta u Federaciji BiH;
- Statistički podaci o narušavanju javnog reda i mira na prostoru Federacije BiH;
- Statistički podaci u oblasti sigurnosti saobraćaja u Federaciji BiH;
- Statistički podaci iz oblasti ilegalnog posjedovanja oružja u Federaciji BiH;
- Informacije o napadima na ovlaštene službene osobe i upotrebi sredstava prinude;
- Godišnji i polugodišnji izvještaji o radu Federalne uprave policije,
- Druge informacije koje su pod kontrolom Federalne uprave policije, osim informacija koje su Zakonom o slobodi pristupa informacijama u Federaciji Bosne i Hercegovine, izuzete od saopštavanja.

Oblik informacija

Oblik u kojem se informacija daje, zavisno od zahtjeva, može biti kao kopija postojećeg originalnog dokumenta ili u vidu elektronskog zapisa ili kao posebno sačinjena informacija u vezi sa zahtjevom sa pozivom na izvor podatka.

Mjesto pristupa informacijama

Podnosilac zahtjeva može dobiti, odnosno pristupiti traženim i odobrenim informacijama u službenim prostorijama Federalne uprave policije, pri čemu će se poduzeti sve potrebne mjere radi ostvarivanja prava svakog tražioca informacije u skladu sa odredbama Zakona o slobodi pristupa informacijama u Federaciji BiH.

WEB SITE FUP-a: www.fup.gov.ba
E-MAIL ADRESA: zospi@fup.gov.ba
FAX: +387 (0)33 59 02 33